

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৭৯/২০১৭-১৮

ঢাকা, রোববার ২২ অক্টোবর ২০১৭, ৭ কার্তিক ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। প্রধানমন্ত্রীকে জাতিসংঘ মহাসচিবের ফোন : রোহিঙ্গা সংকট নিয়ে আলোচনা
- ২। ব্রিটিশ সংবাদপত্র গার্ডিয়ানে প্রধানমন্ত্রী শেখ হাসিনার ভূয়সী প্রশংসা
- ৩। আজ আসছেন সুষমা স্বরাজ
- ৪। রোহিঙ্গা সমস্যার স্থায়ী সমাধানে ডি-৮ সম্মেলনে সহায়তার আশ্বাস
- ৫। দেশের উন্নয়নে এগিয়ে আসা তরণ-তরণীরাই আগামী দিনের নেতা : সজীব ওয়াজেদ জয়
- ৬। মঙ্গা বা দুর্ভিক্ষ বাংলাদেশ থেকে উঠে গেছে, মানুষের খাদ্য নিরাপত্তা নিশ্চিত : খাদ্যমন্ত্রী
- ৭। অসাম্প্রদায়িক ধারা বজায় রাখতে সরকার বন্ধপরিষ্কার : পরিকল্পনামন্ত্রী
- ৮। নিরাপদ সড়ক দিবস আজ
- ৯। আবহাওয়ার উন্নতি না হলে সব ধরনের নৌযান চলাচল বন্ধ রাখার নির্দেশ

১। প্রধানমন্ত্রীকে জাতিসংঘ মহাসচিবের ফোন : রোহিঙ্গা সংকট নিয়ে আলোচনা

প্রধানমন্ত্রী শেখ হাসিনাকে ফোন করে রোহিঙ্গা সংকট নিয়ে কথা বললেন জাতিসংঘের মহাসচিব অ্যান্টোনিও গুতেরেস। এ ফোনালাপে রোহিঙ্গা সংকট সমাধানে পথ খুঁজে বের করতে আলোচনা করেন তাঁরা। জাতিসংঘ মহাসচিব গতকাল (২১ অক্টোবর শনিবার) রাত সাড়ে ৯ টার দিকে প্রধানমন্ত্রীকে ফোন করেন। এ ফোনালাপে প্রধানমন্ত্রী শেখ হাসিনা রোহিঙ্গাদের যেন শীঘ্রই ফিরিয়ে নেওয়া হয় সেজন্য মিয়ানমারের প্রতি চাপ প্রয়োগ করার জন্য জাতিসংঘসহ অন্যান্য আন্তর্জাতিক সম্প্রদায়ের প্রতি আহ্বান জানান। মহাসচিব অ্যান্টোনিও গুতেরেস রোহিঙ্গাদের জন্য বাংলাদেশের নেওয়া বিভিন্ন পদক্ষেপের প্রতি অকুণ্ঠ সমর্থন জানিয়ে প্রধানমন্ত্রী শেখ হাসিনাকে ধন্যবাদ জানান। অ্যান্টোনিও গুতেরেস ও শেখ হাসিনা টেলিফোনে প্রায় ২০ মিনিট রোহিঙ্গা সংকট নিয়ে আলোচনা করেন। রোহিঙ্গা সংকট অবসানে জাতিসংঘের সাধারণ পরিষদে তাঁর তুলে ধরা পাঁচ দফা প্রস্তাব যাতে বাস্তবায়িত হয় সেজন্য গুতেরেসের সমর্থন চান প্রধানমন্ত্রী। সূত্র-ইত্তেফাক (পৃ.১,ক.১), সমকাল (পৃ.১,ক.১), অবজারভার (পৃ.১,ক.৮), ইন্ডিপেনডেন্ট (পৃ.১,ক.২)।

২। ব্রিটিশ সংবাদপত্র গার্ডিয়ানে প্রধানমন্ত্রী শেখ হাসিনার ভূয়সী প্রশংসা

বাংলাদেশকে সুদক্ষ হাতে পরিচালনা করে সারাবিশ্বে দেশের ভাবমূর্তি উজ্জ্বল করতে গুরুত্বপূর্ণ অবদান রাখায় প্রধানমন্ত্রী শেখ হাসিনার ভূয়সী প্রশংসা করেছে ব্রিটিশ প্রভাবশালী সংবাদপত্র গার্ডিয়ান। গত ২০ অক্টোবর শুক্রবার পত্রিকাটির এক প্রতিবেদনে প্রধানমন্ত্রীর এ প্রশংসা করা হয়। প্রতিবেদনে বলা হয়, গত ১৩ বছর ধরে দেশের উন্নয়নে ব্যাপক ভূমিকা রেখে চলেছেন প্রধানমন্ত্রী শেখ হাসিনা। সূত্র-ইনকিলাব (পৃ.১,ক.১), এশিয়ান এজ (পৃ.১,ক.৭)।

৩। আজ আসছেন সুষমা স্বরাজ

চব্বিশ ঘণ্টার ঝটিকা সফরে আজ (২২ অক্টোবর রবিবার) দুপুরে ঢাকায় আসছেন ভারতের পররাষ্ট্রমন্ত্রী সুষমা স্বরাজ। আজ বিকালে তিনি বাংলাদেশ-ভারত যৌথ পরামর্শক কমিটির (জেসিসি) বৈঠকে যোগ দেবেন। এতে পররাষ্ট্রমন্ত্রী এ এইচ মাহমুদ আলী বাংলাদেশের প্রতিনিধিদলের নেতৃত্ব দেবেন। জেসিসি'র বৈঠকে দুই দেশের মধ্যকার দ্বিপাক্ষিক সকল ইস্যুর নিয়ে আলোচনা, প্রধানমন্ত্রী শেখ হাসিনা ও ভারতের প্রধানমন্ত্রী নরেন্দ্র মোদীর গৃহীত সিদ্ধান্তসমূহ পর্যালোচনা এবং সহযোগিতার নতুন ক্ষেত্র নিয়ে আলোচনা হবে। সবকিছুর উপরে দ্বিপাক্ষিক ইস্যুর বাইরে রোহিঙ্গা সংকট নিয়ে গুরুত্বপূর্ণ আলোচনা হবে সুষমার এই সফরে। ইতোমধ্যে ভারত রোহিঙ্গা সংকটে বাংলাদেশের পাশে থাকার অঙ্গীকার করেছে। এখন বাংলাদেশের প্রত্যাশা ভারত সক্রিয় ও বলিষ্ঠ ভূমিকা রাখুক। সূত্র-ইত্তেফাক (পৃ.১,ক.৪), সমকাল (পৃ.১,ক.৮), অবজারভার (পৃ.১,ক.৬), ইন্ডিপেনডেন্ট (পৃ.১,ক.৮)।

৪। রোহিঙ্গা সমস্যার স্থায়ী সমাধানে ডি-৮ সম্মেলনে সহায়তার আশ্বাস

রোহিঙ্গা সমস্যার স্থায়ী সমাধানে রাজনৈতিক ও মানবিক সহায়তা দেবে ডি-৮ সদস্যভুক্ত দেশগুলো। গত ২০ অক্টোবর শুক্রবার তুরস্কের ইস্তাম্বুলে সমাপ্ত নবম ডি-৮ সম্মেলন থেকে এ ঘোষণা দেওয়া হয়। ডি-৮ সম্মেলনে ছয়সদস্যের বাংলাদেশ প্রতিনিধিদলের নেতৃত্ব দেন পররাষ্ট্র প্রতিমন্ত্রী শাহরিয়ার আলম। ডি-৮ সদস্যভুক্ত দেশগুলো মিয়ানমারের রাখাইন রাজ্যে রোহিঙ্গা হত্যাকাণ্ড ও তাদের পালিয়ে আসার ঘটনাকে 'জাতিগত নিধন' হিসেবে চিহ্নিত করে। এ ছাড়া তারা মিয়ানমারের বাস্তবায়িত নাগরিকদের অধিকার নিশ্চিত করে মর্যাদাপূর্ণ প্রত্যাবাসনের ওপর গুরুত্বারোপ করেন। সম্মেলনের সমাপনী বক্তৃতায় তুরস্কের প্রেসিডেন্ট এরদোয়ান বিপন্ন রোহিঙ্গাদের আশ্রয় এবং তাদের সমস্যা সমাধানে মানবিক দৃষ্টিভঙ্গির জন্য প্রধানমন্ত্রী শেখ হাসিনার প্রশংসা করেন। প্রেসিডেন্ট এরদোয়ান রোহিঙ্গা সংকটে বাংলাদেশের পাশে থাকার জন্য ডি-৮ভুক্ত সব দেশসহ আন্তর্জাতিক সম্প্রদায়ের প্রতি আহ্বান জানান। রোহিঙ্গা সংকটের জরুরি সমাধানে আন্তর্জাতিক প্রচেষ্টাকে ত্বরান্বিত করতে ভূমিকা রাখার প্রতিশ্রুতি দেন মালয়েশিয়ার উপপ্রধানমন্ত্রী আহমেদ জাহিদ হামিদিসহ অন্যান্য

দেশের প্রতিনিধিরা। সূত্র-সমকাল (পৃ.২,ক.৫), সংবাদ (পৃ.১,ক.৪), ইন্ডিপেনডেন্ট (পৃ.১,ক.৫), ফিনানশিয়াল এক্সপ্রেস (পৃ.১,ক.৭)।

৫। দেশের উন্নয়নে এগিয়ে আসা তরুণ-তরুণীরাই আগামী দিনের নেতা : সজীব ওয়াজেদ জয়

প্রত্যন্ত অঞ্চলে বসে নিজেদের উদ্যোগে দেশের উন্নয়নে এগিয়ে আসা তরুণ-তরুণীদের বাংলাদেশের আগামী দিনের নেতা অভিহিত করছেন প্রধানমন্ত্রীর আইসিটিবিষয়ক উপদেষ্টা সজীব ওয়াজেদ জয়। গতকাল (২১ অক্টোবর শনিবার) ঢাকার সাভারে শেখ হাসিনা যুবকেন্দ্রে এক অনুষ্ঠানে দেশের বিভিন্ন অঞ্চলে উন্নয়নে ভূমিকা রাখা তারুণ্যনির্ভর ৩০টি সংগঠনের হাতে 'জয় বাংলা ইয়ুথ অ্যাওয়ার্ড' তুলে দেওয়ার সময় তাদের তিনি এই অভিধা দেন। সূত্র-সংবাদ (পৃ.১৫,ক.১), ইত্তেফাক (শেষ পৃ.,ক.৫), ইন্ডিপেনডেন্ট (শেষ পৃ.,ক.৮), নিউ নেশন (পৃ.৩,ক.২)।

৬। মঙ্গা বা দুর্ভিক্ষ বাংলাদেশ থেকে উঠে গেছে, মানুষের খাদ্য নিরাপত্তা নিশ্চিত : খাদ্যমন্ত্রী

সরকার দেশের ১৬ কোটি মানুষের খাদ্য নিরাপত্তা নিশ্চিত করতে সম্পূর্ণভাবে সক্ষম হয়েছে। মঙ্গা বা দুর্ভিক্ষ শব্দটি বাংলাদেশ থেকে উঠে গেছে। পাশাপাশি মানুষের পুষ্টিকর ও নিরাপদ খাবার প্রাপ্তির মৌলিক অধিকার নিশ্চিত করতে সরকার নিরলস কাজ করে যাচ্ছে বলে মন্তব্য করেছেন খাদ্যমন্ত্রী এডভোকেট কামরুল ইসলাম। এছাড়া গ্রামের মানুষের শহরমুখিতা কমাতে পর্যাপ্ত কর্মসংস্থানের ব্যবস্থা নেওয়ার পাশাপাশি গ্রামীণ অবকাঠামো উন্নয়নে বিদ্যুৎ, গ্যাসসহ সকল প্রকার সুবিধা নিশ্চিত করতে কাজ করে যাচ্ছে সরকার। বিশ্ব খাদ্য দিবস উপলক্ষে গতকাল (২১ অক্টোবর শনিবার) রাজধানীর ড্যাফোডিল ইন্টারন্যাশনাল ইউনিভার্সিটির পুষ্টি ও খাদ্য প্রকৌশল বিভাগের উদ্যোগে 'অভিবাসনের ভবিষ্যৎ বদলে দিন, খাদ্য নিরাপত্তা ও গ্রামীণ উন্নয়নে বিনিয়োগ করুন' শীর্ষক সেমিনারে এসব কথা বলেন খাদ্যমন্ত্রী। সূত্র-জনকণ্ঠ (পৃ.৩,ক.৪), ইত্তেফাক (পৃ.৩,ক.১)।

৭। অসাম্প্রদায়িক ধারা বজায় রাখতে সরকার বন্ধপরিকর : পরিকল্পনামন্ত্রী

পরিকল্পনামন্ত্রী আ হ ম মুস্তফা কামাল বলেছেন, সরকার অসাম্প্রদায়িক ধারা বজায় রাখতে বন্ধপরিকর। বাংলাদেশ একটি সর্বধর্মের সম্প্রীতির দেশ। সকল ধর্মের মানুষ মুক্তিযুদ্ধে অংশ নিয়ে দেশ স্বাধীন করেন। গতকাল (২১ অক্টোবর শনিবার) কুমিল্লার কোটবাড়ীতে বাংলাদেশ ও থাইল্যান্ডের উদ্যোগে ইয়ংম্যান্স বুডিস্ট অ্যাসোসিয়েশন এবং সংঘরাজ জ্যোতিপাল মহাথের ফাউন্ডেশন আয়োজিত বিশ্ব শান্তি প্যাগোডা অনালয়ো-এর উদ্বোধন ও কঠিন চীবর দানোৎসব অনুষ্ঠানে মন্ত্রী এসব কথা বলেন। সূত্র-সমকাল (পৃ.৭,ক.৮), ইত্তেফাক (পৃ.৪,ক.২)।

৮। নিরাপদ সড়ক দিবস আজ

আজ ২২ অক্টোবর রোববার জাতীয় নিরাপদ সড়ক দিবস। নানা কর্মসূচির মধ্য দিয়ে এবছর দেশে প্রথমবারের মতো দিবসটি পালিত হবে। দিবসটিতে এবারের প্রতিপাদ্য ধরা হয়েছে, 'সাবধানে চালাবো গাড়ি, নিরাপদে ফিরবো বাড়ি।' গত ৫ জুন প্রধানমন্ত্রী শেখ হাসিনার সভাপতিত্বে অনুষ্ঠিত মন্ত্রিসভার বৈঠকে এ দিনটিকে জাতীয় নিরাপদ সড়ক দিবস ঘোষণা করা হয়। এ উপলক্ষে পৃথক বাণী দিয়েছেন রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা। সূত্র-সংবাদ (শেষ পৃ.,ক.২), ইত্তেফাক (পৃ.৩,ক.৮), নিউজ টুডে (পৃ.৩,ক.২)।

৯। আবহাওয়ার উন্নতি না হলে সব ধরনের নৌযান চলাচল বন্ধ রাখার নির্দেশ

দুর্যোগপূর্ণ আবহাওয়ার কারণে ঢাকা সদরঘাট নদীবন্দর থেকে সারাদেশে সব ধরনের নৌযান চলাচল বন্ধ রাখার নির্দেশ দিয়েছে অভ্যন্তরীণ নৌপরিবহন কর্তৃপক্ষ (বিআইডব্লিউটিএ)। আবহাওয়া পরিস্থিতির উন্নতি না হওয়া পর্যন্ত সদরঘাট থেকে ৪১টি রুটে নৌচলাচল বন্ধ থাকবে। বর্তমানে সব নদীবন্দরে দুই নম্বর নৌ হুঁশিয়ারি সংকেত জারি রয়েছে। এ ছাড়া উপকূলীয় এলাকায় ঝড়ো হাওয়াসহ দুর্যোগপূর্ণ আবহাওয়া থাকায় সারাদেশের নৌযান চলাচল বন্ধ ঘোষণা করা হয়েছে। আবহাওয়ার উন্নতি না হলে এই নির্দেশ বহাল থাকবে। সূত্র-সংবাদ (পৃ.২,ক.৮), ইনকিলাব (পৃ.৮,ক.৬), বাংলাদেশ টুডে (শেষ পৃ.,ক.৫)।

সম্পাদকীয়

- ক. সমকাল, প্রথম আলো, সংবাদ : ঢাকা বিশ্ববিদ্যালয়ের ঘ ইউনিটের স্নাতক প্রথম বর্ষের ভর্তি পরীক্ষার প্রশ্নপত্র ফাঁস হওয়ার অভিযোগের পরিপ্রেক্ষিতে তদন্তসাপেক্ষে যথাযথ ব্যবস্থা নেওয়ার দাবি।
- খ. ভোরের কাগজ : সিলেটের গুরুত্বপূর্ণ সড়ক-মহাসড়কগুলোর বেহাল দশার কথা উল্লেখ করে দ্রুত সড়কগুলো সংস্কারের সুপারিশ।
- গ. ইত্তেফাক : রাজধানীতে বেওয়ারিশ কুকুরের সংখ্যা উদ্বেগজনকভাবে বাড়ায় জলাতঙ্কের ঝুঁকি বাড়ছে উল্লেখ করে কুকুরের সংখ্যা নিয়ন্ত্রণে যথাযথ উদ্যোগ নেওয়ার ওপর গুরুত্বারোপ।
- ঘ. সংবাদ, ইনকিলাব, যুগান্তর, যায়যায়দিন : দেশে পরিবেশ দূষণের কারণে প্রতি চারজনের মধ্যে একজনের মৃত্যু হওয়ায় উদ্বেগ প্রকাশ করে দূষণ রোধে সবাইকে সচেতন হওয়ার আহ্বান।
- ঙ. নিউ নেশন : প্রাথমিক বিদ্যালয়ে মানসম্পন্ন শিক্ষক নিয়োগের সুপারিশ।
- চ. নিউ এজ : ঢাকা, চট্টগ্রামসহ দেশের বড় শহরগুলোর জলাবদ্ধতা নিরসনে কার্যকর ব্যবস্থা নেওয়ার ওপর গুরুত্বারোপ।
- ছ. নিউজ টুডে : সাভারে ট্যানারিশিল্প স্থানান্তরিত হওয়ায় ধলেশ্বরী নদী দূষণের শিকার হচ্ছে উল্লেখ করে দূষণ রোধে দ্রুত যথাযথ ব্যবস্থা নেওয়ার সুপারিশ করে সম্পাদকীয় প্রকাশ।

উপসম্পাদকীয়

ইনকিলাব পত্রিকায় প্রকাশিত কলামে উল্লেখ করা হয়েছে, মাদকের ভয়াবহ ছোবল থেকে আগামী প্রজন্মকে বাঁচাতে পারিবারিক, সামাজিক ও রাষ্ট্রীয় মূল্যবোধ রক্ষা করতে হবে।

নিবন্ধ ও ফিচার

প্রথম আলো পত্রিকায় প্রকাশিত 'স্বাস্থ্য খাত : বাংলাদেশকে দীর্ঘপথ পাড়ি দিতে হবে' শিরোনামের নিবন্ধে অভিমত প্রকাশ করা হয়েছে, স্বাস্থ্যখাতের উন্নয়নের জন্য প্রাতিষ্ঠানিক উৎকর্ষ বৃদ্ধির পাশাপাশি দুর্নীতি রোধ করতে হবে।

#

ডালিয়া/ফাহিমা/সাদ্দা/রশীদ/২০১৭/৯.০০

